


المكان

انا كل شي في هذا الزمان وعامل احسابه
ولكن ماعملت حساب بيوم افارق عيونك
لقيتك بس ضيعتك وكن الكون متشابه
اجل ماهي غريبه لاعدى عاقلك مجنونك
يناديك الخفوق ارجع يا اول واخر احبابه
وتمناك العيون اللي نظرها سارقه لونها
ترى مايقرب العاشق لمعشوقه سوى غيابه
ياقربك والدليل ان بخفوقي زادت طعونك
تذكرت المكان اللي بدينا وانتهينا به
وذكرن بوقتها كل الكلام اللي وقف دونك
ياكثرك لا طرى نسيانك وحدتني اسبابه
تجي كنك غزو تفرض مواعيدك وقانونك
لقيت بقربك الدنيا وغيرك ويش ابلقابه
تفضل جيت اقهيوك القصايد واشرب بهونك
وتعزوا بي اليا من ضقت وغيري لاتعزوا به
ترى ما استاهلك لامن هقيت وخابت ضنونك
حبيبي او حياتي او خذ العمر وتسمابه
تصدق كل ماتطري اقول اموت ماخونك
اذا هي بالغلا محد سواك اغليه واشقابه
احس الشوق ياخذ من حياتي يوم يطرونك
كفا غيبه وعلمني وش اللي فيني اتهابه
ترى كلي ضعيف اليا سرحت وضعت بعيونك
عطالله فرحان



فاقد قلوب

قوم ياليل عجل لايطول الغروب
لو ما طاب ل.. جفون العيون / السهر
بس تدري وش اللي حدني ل.. الهروب
ودّي اسمع ب.. صدك (يا صباح الطهر) ،
فاقد قلب لا والله (فاقد قلوب)
مادرت (ساعه ب.. هجر الحبايب / شهر) !
كيف لاضقت ب.. الفرقا تغيب الدروب
وكيف يبخل على العطشان / ماي النهر ؟
وكيف ابنسى وانا اللي لاصدفت الهبوب
يطري العود ، لامن مال معه الزهر !
من حلاها لو (الشاهي تذوقه / تذوب)
ومن غلاها لو (أبنسى) يبيلي دهر !
ولو هجر الحبايب عن حبيبي ، يتوب
كان قدمت (دمعي / ل.. الموصل ، مهر)
اسرفت ب.. الدموع وب.. الجفا والذنوب
كنها تقول :- (عينك ماوراها ظهر) !!
وانت ياليل وينك لايطول الغروب
مابقى شي من قو الجفا ماظهر
غير حاجه ب.. صوب وكل حاجه ب.. صوب
(البلا ، والغريبه ، والعجب ، والقهر) :-
كل ماجتني الضيقه / نصيت الدروب
ولادريت إلا انا ياليل (وسط الظهر) !

عبدالعزیز السبیل

